

**Kerajaan Selangor Perlu Beri Penjelasan Mengenai Hutang Talam RM80 Juta
Bernama
17 Julai, 2012**

KUALA LUMPUR, 17 Julai (Bernama) -- MCA mahu kerajaan negeri Selangor pimpinan PKR menjelaskan mengenai laporan bahawa Talam Corporation Bhd berhutang kira-kira RM80 juta dengan Perbadanan Menteri Besar (MBI).

Ketua Biro Profesional Muda parti itu Datuk Chua Tee Yong berkata jumlah RM80 juta itu bercanggah dengan kenyataan yang diberikan kerajaan Selangor sebelum ini pada 2010 bahawa ia berhutang RM30 juta dengan Talam.

"Berdasarkan hansard Dewan Undangan Negeri Selangor pada 9 Nov, 2010, pada muka surat 18, kerajaan Selangor berhutang dengan Talam RM30 juta dan akan bayarnya kemudian.

"Bagaimanapun selepas pendedahan dan dipersoalkan oleh MCA pada 12 Julai 2012, kerajaan Selangor tiba-tiba mengumumkan sebanyak RM80 juta masih belum dikutip daripada Talam.

"Mereka masih tidak memberikan penjelasan mengenai apa sebenarnya yang berlaku dan kenapa RM80 juta ini hanya didedahkan sekarang," katanya kepada pemberita di Wisma MCA di sini.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=681406>

